

珍

執

宦

文

鈔

珍執定文鈔卷六

武進莊述

答孫季述觀察書

承示所辨周公稱王屬宋人之見宋儒說經類多憑臆  
述祖嘗學尙書病其無可依據爲孔傳又陋且畧求之  
於伏生傳馬鄭王諸家注時亦有所去就而一折衷於  
書序書序所有傳注不同則從書序漢儒所言孔孟不  
言則不敢從漢儒彼謂周公稱王者固非漢儒初說也  
其說蓋本之孫卿子而尸子曰倡之於前孟子之時尸  
佼書未行於中國故孟子辨益伊尹而不及周公漢儒

之學多自孫卿故不可不知所擇如以大誥諸篇之王  
爲周公康誥之孟侯爲成王畧說天子太子年十八曰  
孟侯是周公稱王成王爲太子矣而酒誥成王若曰之  
成王謂成王耶抑謂周公耶鄭氏以成王爲成道之王  
則成王亦周公矣又逸書成王征攝政三季伐管蔡時  
事也所稱成王者又將何解耶周公謀之成王臨事乃  
往事畢則歸毋乃曲謂之說乎書易失誣不可不辨非  
敢立異也又示說文無瑛字是珍字之誤按爾雅瑛寶  
也揆試也比次皆同文異訓卽六書之假借蓋古文字  
少瑛揆皆借寗魯頌泮林瑛與林音金韻改字不如借

偏旁也敢以質之執事幸賜教之

答孫季述觀察書

前奉鈞誨并賜示文王受命稱王攷徵引該博足破唐人臆論惟史記殷本紀周武王爲天子其後世貶帝號號爲王不無疑義書大傳帝乃稱王而入唐郊是稱王不始於周董生書三代改制質文大畧以爲王者必受命而後王同時稱帝者五稱王者三周人之王紂虞曰帝與尙書唐虞稱帝夏殷稱王正合顧說尙書者皆莫之及太史公據漢立法固宜稱周爲王而以夏殷爲帝殷本紀乃謂周自貶號爲王非經義矣楚吳越稱王徐毫之等蠻夷之俗故春秋不書楚越之王喪非不責其

僭號也尙書已刻竣否急欲得一讀歸途閱江叔澐尙書頗緣以尋繹有一二事欲獻其疑如三亳之亳似當從說文在京兆杜陵亭者爲是皇甫謐以爲西夷之國其北亳南亳西亳之說固屬無稽似不必定以地名爲亳卽是湯舊都之民服文王者左氏傳云肅慎燕亳吾北土也豈亦有湯舊都民乎又六宗之義終未能決幸閣下教之尙書疏通知遠之教三代帝王大經大法畧具竊不自量欲采集西漢以前諸儒傳記爲一書以畱微言大義於萬分一牽於吏事不克卒業倘幸得以屬吏趨幕下或賜以朝夕之閒教誨成就之幸甚幸甚

答孫季述觀察書

婁奉手示雜誦再三咸佩奚似述祖自去歲患潰瘍遷延一載已成廢疾足迹不能踰戶庭然伯牛自牖神明不斲子與鑑井形骸非我辱承垂問未嘗不思距躍三百曲踊三百也大箸尙書今古文義疏用古天文說釋堯典可破祖冲之以來相循皮傅之論皋陶謨五服五章引據書大傳以改鄭義案續漢書輿服志云永平二年詔有司采周官禮記尙書皋陶篇萊輿服迄歐陽氏說公卿以下迄大小夏侯氏說蓋今文已自不能無異同而鄭氏本周官司服五冕以立說與尙書不必盡合

閣下爲之折衷使知定制渴於惠讀禱切企切又祖考  
來格虞賓在位竊謂馬季長所云舜除瞽瞍之喪祭宗  
廟說最爲近之大傳所云帝乃稱王而入唐郊以丹朱  
爲尸述祖舊時曾據以駁祭法有虞氏宗堯之誤國語  
曰有虞郊禘而宗舜此二王後所用之郊卽可以知舜  
之郊矣蓋舜受禘禪不改唐郊以無配天之祖也王者  
祖有功宗有德而四親廟以亞升此百世可知者書曰  
祖考來格記曰宗廟饗之其義一也豈得以受禪於唐  
而爲異說哉所以不郊顓頊者以公羊春秋改制質文  
推之有虞氏世顓頊爲高陽氏之帝其後已不得行郊



禮且諸侯不得祖天子其子孫卽爲天子亦不敢追爲之立廟故虞夏始祖無廟祫禘皆於中學明堂之位祭之夏郊則鯀商周則不郊饗而郊真郊稷虞自顓頊以下無有功烈於民如鯀如真如稷者是以不改唐郊亦非以堯爲有虞氏配天之祖也又唐郊以丹朱爲尸猶夏郊以董伯爲尸鄭注甚明與薦禹事無涉蓋此在十有三祀而薦禹則十有四祀見竹書紀年注又文選注佺十有五祀竊又以孟子所云舜薦禹於天十有七年及史記所云舜踐帝位三十九年證之非井有三祀卽卅有四祀不無傳寫之訛路史以爲宅立三十有三載

則據東晉古文改也惠定字但見太平御覽所引與維  
五祀奏鍾石論人聲誤合爲一篇且編錄後失次固  
不可以爲定本矣問閣下近稟古天文說石鼓文尸子  
定本此皆述祖所未見書幸各賜一通不啻百朋之錫  
也又聞尸子述魏鄭公羣書治要錄出未知所載古書  
尚有可拾遺補闕者否病廢日久所見益固陋唯閣下  
憐其無成而時惠教之幸甚幸甚

復錢竹初大令書

昨承詢莊子至樂篇得水則爲陸歸檢陸元朗音義云  
此古絕字徐音絕今讀音繼司馬本作繼云萬物雖有  
朕兆得水土疑作氣乃相繼而生也本或作斲又作續

斲述祖按當從繼讀說文繼續也从糸陸一曰反斲爲  
繼此雍熙本也今繫傳本同韻會引說文云繼續也从  
糸陸聲或作陸反斲爲陸斲古絕字韻會所引說文皆  
小徐本是繫傳有陸字檢玉篇廣韻無之唯古文四聲  
韻王庶子碑繼作陸或卽繼字古文然以許氏義例求  
之當從今本爲正闕疑可也至樂云種有幾得水則爲

陸與養生主所云火傳皆外生之說是南華重言司馬  
紹統注得之管子水地首楞嚴四大可以互相發明但  
管則用其下流以爲養生治世之說而首楞嚴最近莊  
摠之金剛則無水繼般若則爲火傳其要指一也項君  
皇極經世鑰其三數於四分之外更言實秣則知日之  
正行與差數不同是於中西古今之法皆通者也以易  
之三百六十當期之日爲天體實用西法而託之於易  
易明言當期之日陸續曰日月十二交會積三百五十  
四日有奇爲一會今云三百六十當期則實十二月六  
日也十二月爲一期故云當期之日也皇極經世曰體

有三百八十四而用止三百六十乾坤坎離之不用也  
用止三百六十而有三百六十六乾之全用也皆不以  
當期之日爲天體也其言甲寅者四分之元甲子者實  
秣之元必確有所見述祖不能爲算無由得其精微之  
詣項君畢生絕學至老而欲傳之能爲刊行以俟知者  
甚盛舉也容細讀再繳不宣

答錢竹初先生辨說文梃字書

檢說文雍熙本梃字凡兩見其一曰梃木也實如梨从

木尼聲

唐韻女履切

其一曰屎簍柄也从木尸聲重文梃屎

或从木尼聲

唐韻女履切

故徐鼎臣以爲重出又說文櫛絡

絲櫛从木爾聲讀若梃

唐韻奴禮切

今本徐楚金說文繫傳

脫梃木之梃於屎重文梃下釋云臣錯案周易繫于金

梃是也黃公紹韻會梃女履切說文木名實如梨从木

尼聲一曰止輪木

類篇引說文

韻會所引說文皆繫傳

本此十四字卽繫傳之脫文也玉篇屎丑利切簍柄也

重文仝屎引說文女几切是說文屎之重文仝屎與梃

木之梲不同然其从木尼聲則一周易音義梲徐乃履反又女紀反廣雅云止也說文从𣥂𣥂云絡絲跌也讀若昵字林音乃米反王肅从𣥂手子夏从𣥂蜀才从尼止也以所引說文攷之二徐本之誤自見如屎重文从𣥂則絡絲𣥂與𣥂柄義本相近不必異文从𣥂矣又廣雅釋詁云梲止也證以釋文字當从𣥂王肅欲易止訓故破𣥂从𣥂手耳𣥂蓋屎之重文傳寫誤从木玉篇又以同𣥂木之梲故从𣥂以別之也周易兼義云梲之爲物衆說不同王肅之徒皆爲織績之器婦人所用惟馬云梲者在車之下所以止輪令不動者也李鼎從集

解廣翻曰柅謂二也與爲繩故繫柅乾爲金與木入金

柅之象也九家易曰絲繫於柅猶女繫於男故以喻初

宜繫二也柅之異義略見於此大底訓爲止車木訓爲

止則从木佗柅或佗尼訓爲絡絲柅訓爲箋柄則从手

佗柅或佗柅或佗鏹二徐本說文無柅字玉篇廣韻以

爲柅柅之柅集韻類篇或訓止皆不以爲屎重文無織

績之器義與王說異玉篇雖柅屎有別然釋柅與柅皆

云木名又絡絲柅文異義同尤爲淆雜其實說文柅爲

木名又爲止輪木馬說所本屎爲箋柄又佗柅从手尼聲王說

柅爲絡絲柅讀若昵犁然各別後人失其讀俗字譌



訓目以滋多述祖於易象未闕其奧僅辨字體詁舛之  
由以備采擇牽綴複冗不知所裁

與趙億生司馬書

不相見久獲奉談譙深慰契濶之思爲日無幾又各一方勞竚如何溽暑伏惟鈞侯動定萬福述祖日困於簿書無可爲知已道宵光秉燭苦學之煩欲觀諸要轉益汎濫竊怪漢用黃老而致文景之治孝武尙儒術天下日多事豈真儒者博而寡要勞而少功失其本矣儒林之興多自孫卿其學先制化趨時尚雜功利矜智能所謂王道禮樂者特以矯輓人性而爲之偉詭以致其隆盛焉耳大賢君子間有獨見大義合於六藝之微言如賈生毛公董相韓太傅之倫其餘專門名家能出其範

圍者鮮矣故漢之儒其未能盡醇者孫卿子之儒也至謂周公屏成王而及武王尤諄亂尙書家據以說經復子明辟嘉禾延登誰階之厲執文志敘諸子以爲皆六經之支流餘裔使遇明王聖主得其所折中皆股肱之材韙矣九家皆可曉合經義故荀卿譏孟子畧法先王謂之俗儒此正得其要而易有功者也董生言春秋亦以爲損周之文用夏之質韓詩外傳獨明性善之旨而賈生簾遠堂高之喻見三代忠厚之遺大戴記錄之今佚傳記中如此類者意欲輯爲一書於孫卿以後諸儒之說稍爲區別明其得失以傳六執之末未知能畢此

願否狂簡可裁閣下幸教之

與張茗柯編脩書

昨獲暢談深領教益集註置驛也郵駟也檢韻書駟讀若日驛讀若繹聲雖不同而義不甚相遠置訓驛本廣疋但廣疋郵亦訓驛訓駟未知所本釋言曰駟遽傳也郭注皆傳車駟馬之名左氏有棄駟又棄驛棄遽漢書有棄傳必以爲駟與驛異確據說文驛置騎也駟驛傳也似驛爲騎名駟爲傳名又說文郵境上行書舍廣疋傳舍也故集注以郵爲駟爾疋釋文駟而實反郭音義云本或作遽聲類云亦駟字同說文遽近也唐韻人質切亦讀若日或古今字異未及細攷姑就許氏解畫依

樣胡盧耳孫定公音義郵丁音尤今之驛也不釋置字  
與閣下所說合拌訓棄見方言及廣雅以破拼字固確  
然可據信王懷祖觀察廣正疏證引士虞禮尸飯播餘  
于篚注古文播爲半以拌卽播棄之播其說爲近之說  
文播種也一曰布也敬古文播亦無棄訓竊謂半拌播  
拼皆假借字今本分拼其正字乃說文華字而許氏解爲箕  
屬由誤以華爲畚而闕說文畚字故古文從畚之字小  
篆多从華又呂氏春秋古樂云瞽矇乃拌五弦之瑟作  
以爲十五弦之瑟高誘注拌分是拌又有分訓亦可爲  
拌卽敬之證或可酌取諸說而折中之否

答張茗柯編脩書

連日賜教開誨勤勤數日來天寒手凍未及作答幸勿  
以罪細讀大箸精於治注疏之學當伯仲孔陸二顏非  
近今所易覲敬服敬服來示申申於論韻述祖性善忌  
不能熟於古韻唯平時讀書及授童子讀準以古韻便  
覺章句截然并能辨古書之真僞是非如是而已至其  
神明變化則未之有聞也其所言之或得或失亦無足  
淡議而下問數及之不可驟然無以應命卽以冠辭明  
之三加祝醴辭黜辭非韻知字辭亦非韻也吉月令辰  
非韻知令月吉日亦非韻也醢辭末句之與來韻字辭

之既非韻則非末句可知曰伯某甫以八士證之猶言  
曰伯達甫仲叔季唯其所當猶言曰仲突甫云爾以下  
皆同則某不與之韻當不與永韻亦可知古人用韻有  
同韻亦有同聲同韻不必枚舉同聲之相叶同調是也  
廣韻同徒紅切調徒聊切凡此類者謂之雙聲則同調  
之非必不可叶者亦可知必舍此而以同叶首章之我  
馬既同四章之會同有繹以調叶二章之田車既好四  
章之駕彼四牡此鄙見之所受不敢隨聲附和以誣知  
已者也至論語之禱與與鼃韻芸與勤分韻固無不可  
者但不得以爲例耳唯左右詳察之



荅王伯申問梓材書

昨承示校正說文古文續字反復疏證義甚精核又惠周秦名字解故刊本珍荷珍荷下問梓材斲訓爲終傳引伸其說案梓材曰惟其塗堅茨又曰惟其塗丹牖又

日用懌先王受命古文尙書塗與懌皆作斲

陸德明尙書音義懌

字下云音亦字又作斲下同古無懌字和斲之斲當訓作說段借也經典通用釋字音同

說文云斲

終也

又見廣正

孔穎達正義云室器皆云其字終而考田止

言疆畝不云刈穫者田以一種但陳修終至收成故開其初與下二文互也義本明白以作僞傳者讀斲作塗故又傳會之云二文皆言斲卽古塗字明其終而塗飾

之以下破碎經文曲就其說然賴此尙知古文本作斲  
字後人從傳妄改耳堅茨丹雘爲室器之終事以喻周  
自文武受命至作洛邑殷致刑措而後其事克終先王  
封建規撫及周公所以成文武之德者略具是篇墨凍  
筆膠艸率奉復不能暢所言遲日面陳不備

龔呂叔訥書

昨得惠書并讀大集述祖久蔽錮於庸俗見聞如甕人  
亾入五都之市璀璨光怪得未曾有不覺目旬舌橋繼  
而切理壓心又如逃空虛者之聞鼎沸親戚警欬於其  
側而狂喜也序記襍文直駕李遐叔皇甫持正而尚之  
浸淫乎魏晉矣碑志尤精義法皆足以不朽承詢夏小  
正以季來多疾未克卒業述祖於此書積思已二十餘  
季於夏數夏禮頗見端緒大旨以大正小正王事三等  
爲五科而條析其例世無胡毋生何邵公顧永學膚受  
欲鑿空以發其憤悱其能免於敗績失據哉足下好古

之道爲古之文其有得於微言大義可以教正之者想  
弗吝也俟寫定奉寄家二兄不及作書屬道渴懷束髮  
論交今皆垂暮同譜在者僅五六人良可感喟握手何  
時仰止彌切勉旃珍重不盡欲言

答蔣松如問夏小正書

昨奉手教詢以夏小正所開數難未敢質疑但肄業及之當就正有道子以訓越吁嗟殆閔雨之辭乃難乎而拮据豈急瓜之謂薦聲久並後來訛弋成鳶主形象鑑不必敗夫爲火且鳴鵲著麻事之時浮游興如雪之詠比物醜類可助博依至始於啟蟄本改正以協紀終於噉麋角明失閏以示戒義蘊閎奧難驟窺測向欲爲說義每一展卷望洋愕眙不敢下筆需以歲時或竟其業宋人之楮三年不成鄭賈之璞一笑爲劇無以應命祇益慙慙

荅蔣松如問夏時說義書

承示說義內商曰總章及考異內昉也關本昉作盼一條盼誤作昉沿舊刻之訛當遵改正其以總章爲商之明堂本禮大戴記少間篇成湯率受天命作八政命於總章尙書帝命驗以殷之重屋爲明堂又謂舜曰總章緯書不盡足据而三朝記信而有徵故采其說鄙箸於丁亥萬用入學祭餉條最爲穿鑿而夏時經中此條及初歲祭條爲夏禮之可言者祈爲盡情指摘可改者及今改之幸甚三卷外尙有夏小正音義四卷夏小正解詁二卷等例二卷無力再刻亦未寫定姑留艸槩以俟

後緣近欲撰尙書今古文集解僅載馬鄭王三家注及  
史漢所引異同亦不能遽定其是非讀大箸禹貢詳說  
實事求是縷晰條分非精於輿地安能言之鑿鑿如此  
不朽之業經世之文自當屬之足下述祖不過章句破  
碎所謂致遠恐泥者何足語於大道哉

富蔣松如書

使來蒙嘉貺爲家慈壽謹再拜登謝大箸已讀一過并  
識數條八卦相錯爲六十四一語最得要領上經首乾  
坤終坎離下經首咸恒終既濟未濟乾坤後十卦爲否  
泰咸恒後十卦爲損益而既未濟之於坎離猶否泰之  
於乾坤則天地定位數語於重卦次第如指諸掌又既  
濟說亨小卦不亨也但不如方濟時亨通之大以此解  
虞氏之既濟定可以核全易之用矣河洛之數皆有所  
本既合言漢學者特辨其伏羲時出爲附會於易理固  
無不合卽虞鄭亦不能舍此以言易也先天之圖以五



行言之未嘗不精以方位言之反指帝出乎震爲後天  
則欺人之學也卽納甲亦然宇宙之理包蘊無窮明者  
述之皆可發明聖人之旨但不可執煞耳承示机實黍  
本春秋繁露俗本誤作机說文机作簠古文𧈧𧈧一字  
亦本說文幽風七月鳴鵲王肅云古五字如七司燿故  
書爲燿杜子春改燿月初當約一日奉屈入城與二三  
同人爲竟日之聚冀得暢所欲言孫伯淵過此卽日返  
棹憚子居尚未行聞欲爲足下作易說叙當有一篇大  
文字也此候興居不宣

與威在東說虞庠四郊西郊異同

承示大箸孟子攷折衷至當謹錄副以識景行至西郊  
讀四郊據鄭注校正固確不可易以鄙意窺測自熊皇  
以來已有兩說故疏家並存之如天子設四學疏旣云  
四代之學又引皇氏說以爲四郊皆有虞庠其祀先賢  
於西學注西學周小學也疏云謂虞庠也又云瞽宗則  
在國虞庠爲小學者則在西郊王制疏亦言西郊以西  
序虞庠與東序東膠對文故耳然舍此則鄭祭義注所  
云四學謂周四郊之虞庠又何所本豈鄭注禮時王制  
已有四郊西郊二本鄭注王制則從西郊注祭義則從

西郊爲此騎牆之見邪其實四郊皆有虞庠而養庶老  
祀先賢則在西郊之虞庠非敢以此爲兩家調人蓋漢  
學之存於今者苟有一字一句之異同要當珍若拱璧  
也述祖昨夜忽患脇痛不可忍力疾奉復餘言面悉不  
備

附感在東來書

珍藝先生閣下日前賜飯脩聆誨言敬謝敬謝段顧  
兩君所辨四郊西郊王制周人養國老於東郊養庶  
老於虞庠虞庠在國之西郊此西郊字顧之所據祭  
義天子設四學當入學而太子齒注四學謂周四郊

之虞庠也正義曰皇氏以爲四郊皆有虞庠此四郊  
字段之所據祈先生折衷之以訓庸所未喻則幸甚  
先生大箸夏時說義邇日讀習精確不刊之論略有  
所窺洵足與董子春秋繁露程子易傳二書相並餘  
子所道概不能及今後夏時得與六籍同傳者說義  
之功也庸之讀書自蒙先生指授始識端倪一日不  
奉師教便覺胸次乖謬近誤孟子攷已錄清本叩呈  
鉤政伏乞削定肅稟恭請日安不具後學臧庸再拜

荅丁君士說毛詩書

承示毛詩義數事展函周覽寔有心契乘彼境垣以喻  
越禮最合師法毛公得子夏之傳自宋以來舍而別求  
新說詩學殆絕足下克究其業追鄭軼王甚盛舉也車  
舉四章改鄭義美矣僕請終其物足下率教之毛公說  
詩詳於序者略於傳是詩謂德澤不加於民箋疏皆不  
得其說周南召南王化之基本之后妃夫人之德其思  
得賢女以妃君子在此詩人之辭婁變則其志婁進而  
一寓於物以興其事令人發深長之思陟彼高岡析其  
柞薪申上雖無德與女言之女女民也六義之興一州

一木皆無妄設杵械松柏帝所以省岐山也詩言杵械者皆以喻周高岡之木茂盛庶民得而薪之王者有賢后妃之助則德澤必及下業以喻外戚葛藟亦再言業故其包舉覲博物類繁綏各有攸當不可以一端竟也三百篇盡然雖無好友舊說尤屬支離王者所受諸侯也書曰及邦亦曰及民詩人蓋言苟有其德雖露屋艸茅亦足以配君子而褒姒豈其人哉依彼平林林木之在平地者喻大國也鵲耿介之鳥非睢鳩黃鳥之和聲而善有令德之教則讒巧亦無自而進黜申后而立褒人之女檠弧箕服險孰甚焉可與白華之詩相發明矣

其卒章曰高山仰止景行行止思賢也四牡騤騤六轡  
如琴治民也不可以一端竟也首章曰思卒章曰惻其  
言有文其聲有哀首尾貫通顯然明白人不談文字辱  
下問聊復言之幸時惠閱近箸進僕以所不知跂甚跂  
甚

與劉錫申甫書

頃閱大箸毛詩聲衍部分較前益密幸卽成之序次以不叶入聲者爲正紐叶入聲者爲反紐而以入聲檢押其間仍不大異今韻四聲梗概再細攷其合韻之見於詩及傳記者以通其變亦不必拘拘於說文諧聲之不可通者以下篆多秦漢人造不必盡合古人也斯高雖變亂舊章然是時書師尙有二三遺老未遭阮滅自後則不知而作者多矣至新莽甄豐固無足論但其時秘府古文新列學官卽或不免魯魚亥豕之訛而劉歆揚雄見聞頗異於太常老宿故流傳刀布間雜小篆亦復



不少可採以裨古籍者後周岐陽刻石亦然蓋說文爲字學不祧之祖但屢經傳寫書體多訛此又不能不歸咎於李陽冰之佻侑耳非敢捺入室之戈也吾甥以爲何如衰年同志眼前不過數人每一開口涉筆輒諄諄焉如叔孫之譏趙孟亦可歎也向云泰類無平聲以其同用者少亦非確論今以各部入聲別爲一部則此等枝辭盡可刪矣吾甥識高思深若得成書必能信今傳後拭目俟之

答宋甥于廷書

別後得手札三次差慰懸系前日又晤洪孟慈知吾甥  
就館大興相國處可以肆力於學甚善愚景況如舊唯  
精神日衰然亦不敢廢學近撰說文古籀疏證頗有新  
得竊謂通山亾而有夏小正歸臧亾而有倉頡古文今  
就許氏偏旁條例以幹支別爲敘次亦始一終亥名曰  
黃帝歸臧甲乙經記字正讀意欲以此書與夏小正等  
例爲夏商之易補亾未知能竟其業否如精力不繼而  
中輟尙望吾甥與卿細續成之炳燭苦短無可寄聞特  
以此博吾甥一拊掌耳

答族孫大久論許氏說文書

承示近箸春秋及各經小學敘二首究六書之源流獨見其大以此發前人所未發美矣述祖於許氏書亦嘗稍窺一二其有功於六藝甚鉅自二徐以來爲其學者徃徃殫畢生之力猶不得其要領而足下毅然以爲於六書所由作蓋乎未辨恐不免驚世駭俗且非持平之論也蓋書之所以有六本乎制作之意缺一不可象形指事謂之文會意諧聲謂之字轉注以通會意之窮假借以廣諧聲之用有假借而諧聲之字固省矣故古文字少假借居多象形指事會意諧聲說文所可言者也

轉注假借說文所不言而學者可以類推者也何也考  
老卽解說令長非本字也豈可以許氏所不言爲許氏  
所不知哉總之壁中書之存於說文者無幾而鼎彝款  
識後世滋多亦不能無贗託試取許氏所說者正之以  
拾遺補缺是所望於好古博學之儒也

復從子卿珊詢古文大小篆書

得手書析疑正誤實契余心詢張懷瓘於大篆之外別列籀文之說背書辭不達意茲復悉言之古文大小篆之名始於秦漢之際古文謂伏生張蒼竇公孔安國所獻及郡國閒得鼎彝古器物銘文大篆謂史籀十五篇小篆謂李斯趙高胡毋敬所造至閭里書師合爰厯博學於蒼頡篇學者但謂李斯作小篆不復知有趙高胡毋敬之說矣此亦上蔡莫白之寃也況可仞爲倉史遺文邪以小篆而有篆之名以今文而有古文之名其實大篆亦古文也故呂氏春秋謂倉頡作大篆安得大

篆之外別有籀文邪余向時以石鼓多與大篆合頗不信馬定國字文時物之說及檢後周書有數事可與石鼓相證作石鼓然疑一篇所云不證以事而證以文亦彼此互見者也詩辭蓋出於蘇令綽盧景宣二人之手故石鼓自唐始顯卽表章於綽會孫勗一時盛傳皆以爲宣王時史籀書也唯張懷瓘知其假託又不敢顯然立異書斷於大篆外別爲籀文且云其迹有石鼓文在焉李斯小篆兼采其意則以石鼓閒雜小篆故也是其識過韋韓諸公遠矣說氏許文解字敘例云今敘篆文合以古籀博采通人又云惜道之味聞疑載疑演贊其

志次列微辭蓋許氏之微指在始一終亥之次第至其  
分析小篆推衍偏旁間疑載疑爲之解說固不必盡合  
古大述作之遺意又小篆間雜趙高爰歷尤爲悖理傷  
教如鼎鼎皆近取諸身之字又爲部首悉以亡秦嚴刑  
酷法說之史記云趙高教胡亥書及獄高之書卽高之  
獄也其意欲以漸漬其心使不覺其慘毒若以爲理固  
當然者故余所述古文甲乙篇加此類者皆以古籍文  
定之冀爲許氏拾遺補闕但鍾鼎不比五經古文有師  
說相授受今以一人通其讀竊恐斯事難專況學植荒  
落人病善忘其不能卒業可以逆料幸吾姪有同好他

日可爲去其穿鑿廣其陋略刪其匱重是所深望也力  
疾率復不盡欲言



珍瓠宦文鈔卷七

武進莊述祖葆璣

書邢節婦事

武進縣民邢松林妻陸氏歸邢時年十九逾二年而寡生一女未及晬有勸之嫁者則剪髮誓以死邢故貧至無以爲生傭於人受其直自給人皆呼爲邢嫗云其後女之夫死女不能守其家嫁之嫗聞而咤且怒曰嘻是夫死而忍更嫁人廉耻盡矣則日走其壻之墓哭之曰壻有知何不殺我女遂誓與女生無相見死無相哭嫗老矣以傭終身卒年七十二乾隆四十六年某月某日

也。嫗嘗往來余從祖伯父家，故得其大略。如此余聞而異之。語曰：蓬生麻中，不扶自直；嫗寡且貧，計不能庇其女。女喪其夫，饑寒之不免爲父母者，其爲女計當何如？顧毅然獨責以廉恥，嫗豈不近人情哉！其與誦詩書以古道繩當世爲世詬病者固殊也。彼其所爲非發於中誠而有子孫無窮之慮，名心盡而鄙吝之情見矣。嗚呼！若邢嫗之苦節，豈非出於其性者哉！

余旣書邢節婦事，又聞其前死數日，辭所傭之家而歸其家。或夢舟輿儀從，疑達官貴人。曰：邢節婦至矣。頃之有自嫗所來者，言嫗已死，問之卽其夢之日也。

異哉抑天地之正氣人受之以生無有貴賤智愚強弱之別特利害得失之見奪其心欣羨忮忌苟且一切紛紜百出以自隘之而自怙之耳遂疑聖賢所以充其量而塞乎天地者爲有異於人人牽合傳會日敝敝焉從事於其迹沒世窮年而不悟而匹夫匹婦獨能卓然自得於其心孟子之言性善陽明王氏言良知豈不信然與豈不信然與

文林郎議叙知縣彭君行狀

君諱希韓字玉擎一字守約晚號邊密外大父尚書公之冢孫伯舅桃源府君之長子也桃源府君諱紹謙乾隆十二年舉人由山東新城知縣調汶上署在平陽穀章邱三縣平度濟寧二州遷曹州府桃源同知配繆宜人翰林院庶吉士敦仁女生君君生而穎慧爲大父母所鍾愛十歲讀左氏春秋私寫戰陳事爲小冊得暇卽向婢媼誦說輒娓娓可聽人皆異之少長讀朱子近思錄及儒門法語志有所激發毅然以古人自期儒門法語者君之高祖侍講公所輯先儒講學明道之書也蓋

外家自長寧公侍講公倡正學父子親授受四傳至叔  
舅二林先生而集其成其論學也先爲學者揭鹿洞鶩  
湖會講之旨攜掣提撕竟德敦言鎡去門戶灼知厥真  
先生繼之學旣無所不通而進不止鉢心刻骨反證自  
得率之汪洋澹泊廓然而秋皜怡然而春融人莫能闕  
其涯涘君於從子中季最長每從先生質所疑先生沒  
君養疴閒居教子弟一以宋元明諸儒論說爲宗無所  
翦及晚歲手輯成書名曰退齋日錄其淵源所自固得  
之先生者爲多而要歸於不失家法由其始志於學者  
得所主也君以乾隆三十季舉於鄉出合河康公基田

之門公時方以縣令爲同考也四試禮部屢薦不售最  
後已入中額會同考爭所薦他卷不得爭益力總裁則  
封卷欲上聞事雖解而所薦卷悉擯落君卷亦在所薦  
中君嘗言偶得偶失之在人者我何與焉然自是遂不  
復頓首事科舉之學矣先是充四庫館寫書期滿例以  
本班得縣令時樾源府君已捐館尚書公春秋高君憮  
然曰昔曾子有南遊之泣吾不逮吾親矣何汲汲奉檄  
爲歸侍尚書公色養備至子舍在水北晨起趨問寢視  
膳畢然後庀家事卽寒暑風雨無少閒尚書公家居當  
事時有所諮訪而鄉黨之公事公議則或可或否皆委

之君無不當尚書公意望亭紀

恩亭被風潮傾圯議者或謂亭紀蠲免

恩費應出田畝君曰蘇之賦稅重他郡而民不困者以正供外從無地畝差徭故也一時開其端他事放而行之吾懼作俑之貽害也乃循舊議永遠紳士捐修其處事持大體類如此嘉定顧君維城篤行士也家貧其先人未葬嘗爲君言之未幾而顧君暴病且革使人急邀君至已卒君入哭意顧君所欲言莫有大於其先人之葬者詢其子云父在時卜葬地已從以賈無所出未沒券君卽約諸從之從顧君學者且告諸同學集金襄其

事顧君三世皆得率窆焉桃源府君官山左所至君隨侍卽學吏治晚自退藏閱歷上下古今事益悉故子弟筮仕者經君所指授有古循吏風君有二弟希曾希沆希曾今直隸南皮知縣桃源府君卒時諸弟皆幼從師宦學維君之勤君事大父父母孝事諸父如父友愛諸弟從父弟閨門雍睦禮法秩然年及耆艾卽以病謝世事諸子宦成名立易簣之日皆坐足受遺命全而生之全而歸之君固可無憾也以嘉慶十一年十月四日季季六十三余舅氏及從母之自出內外兄弟有二十餘人君長余六歲合浦君希范仲舅學士公子也與余同



歲以次皆少於余歲壬戌合浦君卒是歲叔舅贈朝議公次子侍御君希洛與君相繼卒而余久病癢足迹不能踰里閭蓋有悲愴不自勝者憶庚申秋余至吳中登君之堂殘暑未退芙蕖已零落盜盜數十羅列庭中君寓意於物而不留意於物人皆謂其雅尚高潔故不樂仕進所性然也余獨惜君才識可以大受而不獲試烏庠其將有待於後之人邪君三娶皆名族元醜顧孺人侯選通判載光女繼醜吳孺人安徽虹縣知縣秉衡女繼醜孔孺人直隸大順廣兵備道繼洞女子男子三人蘊琨湖南石門縣知縣蘊琳候補縣丞蘊璨府學生女

子三人孫男二人念高向高向高殤君率之明季其孤  
蘊琨等卜地於某鄉某原將以某月某日葬先是顧吳  
兩孺人祔葬雅宜山桃源府君之地次故不合葬從君  
治命也八月蘊琨來常州告葬期以君石實圖所以銘  
諸幽述祖素不習古文辭不足以信今而傳後旣固辭  
又重違其請謹掇其應銘法者箸於篇俟有道而能文  
者爲之論譔焉自尙書公以上世出魯里在二林先生  
所爲彭氏家傳先考事狀中不具載

先妣彭恭人行述

嗚呼痛哉不孝迷祖竟爲無母之人耶罪釁叢積不自  
殞滅乃上累吾母不獲享期頤之壽耶不孝於嘉慶二  
年瀝請終養自山左奉吾母歸里迄今十六年中間辛  
酉歲吾母緣悲傷感寒熱類瘧賴醫藥乃間此後雖常  
在帷幙衽席間而神明視聽不衰肢體輕安猶時經理  
家政凡家中舊事衆所不記憶者請於吾母必歷歷指  
示不爽不孝等方共慶幸以爲可永享上壽詎意今歲  
十月中旬忽感風熱欬嗽繼又值驟寒增劇服藥罔效  
及二十二三兩日吾母忽氣拂鬱頓左右述生平夜呼

不孝謂之曰吾一生所歷艱瘁汝年已長大當亦知之  
汝爲我子不可不知我苦汝等皆從苦中長養以至成  
人非安常處順者可比慎無忘我今日所言不孝受命  
惶哽不知所措然猶私慰吾母起居櫛沐不異平時或  
偶有振觸及此孰謂訓言僅隔數日遂爲遺命耶嗚呼  
痛哉昊天罔極罹此鞠凶哀哀鮮民何容視息人世惟  
吾母所以孝父母舅姑相夫子撫遺孤仰事則盡心盡  
力一出於誠俯字則無微不至無刻得安至所歷艱苦  
蓋有不孝等不及盡知者謹就昏迷中所記憶略述一  
二伏冀當代大人先生采擇焉吾母姓彭氏自明初世

居蘇州府長洲縣長寧公諱瓏生侍講公諱定求侍講  
公生同知公諱正乾同知公生尙書公諱啟豐自同知  
公以上皆贈如尙書公官長寧公父子請學累世種德  
至今而族日盛科名甲於吳郡尙書公配宋夫人生四  
子三女吾母其長也吾母年七歲隨侍外祖母至京師  
時從母幼外祖母令吾母攜以寢處從母匍匐飲食輒  
呼大姊後從母殤吾母偶爲不孝等言之未嘗不墮淚  
也時西苑入直者附近僦屋以居外祖母或入城留吾  
母同一老嫗守舍給錢買蔬果吾母飯食外無所需同  
嫗間采杏實以食不輕費一錢然城中時遣僕來必賞

勞之無不欣躍及外祖母返見之笑曰幾許青蚨如此  
見用耶以其餘付吾母仍分給老嫗衆皆稱異以是尤  
得外祖父母歡心讀毛詩孝經朱子小學之書皆外祖  
母所親授也先是外祖父爲丁未會試第一人先大父  
觀察公同榜中式及

殿試讀卷官擬大父卷第一外祖父卷第二

世宗憲皇帝親定外祖父一甲一名大父二甲二名大  
父謂外祖父年少掇巍科無矜容遽色才與德皆足稱  
又以外高祖侍講公爲吳中理學名儒及聞吾母賢淑  
遂爲先考學士府君請婚焉大父與外祖父旣相契重

又申以婚姻氣味尤爲浹洽大父家言中偶舉當世士大夫風氣近古者必以外家爲言及述祖稍有知識至外家侍舅氏朝議公燕談汎及先正嘉言懿行亦未嘗不推先大父爲無間然也乾隆四年吾母年十八其冬府君往吳中親迎及吾母來歸廟見後大母錢夫人甚爲色喜是時大父官浙江海防兵備道吾母爲新婦未逾月卽偕府君隨大母赴海寧曲盡婦道事大父母生意承志與世母吳夫人交相愛敬終始無間言歲時朔望謹遵家規又參以外家禮節每日饋棗栗後率以爲常大父常向親串稱道之其明年大母以積年襄理內

外心力交瘁患肝氣歐吐不進飲食時世母方坐蓐晝則府君偕世父宗伯公侍疾夜則吾母與歸吳氏姑母太安人侍進湯藥衣不解帶者四十餘日吾母每進湯飲大母不知爲吾母也疾少間始問悉執吾母手曰吾病中亦謂僕婦輩不能如此委婉順意也六年府君舉順天鄉試是歲大父引疾解任調理吾母隨大母歸里門七年府君考取內閣中書大父卽於是歲請告回籍八年七月大姊生十年府君下第後與吾母書有不作第一人不歸之語時世父已入翰林同儕邸舍以居是年外祖父以督學浙江還朝外祖母復至京師大父母



命吾母隨侍北上而吾母之拮据勞瘁由是始矣到京  
甫一月外祖父母奉外曾祖同知公諱奔喪回籍益茫  
然無所依十二年二月二姊生吾母產後血暈然在牀  
蓐間無日不經心家事體氣日益羸弱矣十三年世母  
吳夫人來京師相見甚歡是歲冬府君入軍機處辦事  
每入直具有楹必精腆足供數人食府君在軍機前後  
七年

鑾輿巡幸屢派扈從居恒辨色而入遇事立應下直卽  
賓朋滿座而求詩文及書者全集往往炳燭揮豪不暇  
問家事吾母主持中饋咄嗟立辦實皆典質以供者也

十四年府君扈從木蘭於途中感寒疾至家益劇吾母  
醫禱百方始獲就愈卽懇世父母以官允從父仲兄爲  
嗣世父母頗難之吾母嘗爲不孝言彼時適有不幸當  
以身殉今所以不死者爲留汝一綫故也嗚呼痛哉十  
五年外祖父服闋來京師十二月不孝迷祖生先是伯  
舅曹州公過常郡謁大父母大母以百金置伯舅懷中  
蓋稔知吾母持家作苦將屆分娩又恐大父以爲過費  
也伯舅至京以致吾母吾母分爲二以五十金致世母  
曰高年之心懸懸二千里外盍易人役寄歸亦稍盡我  
二人婦職也十六年恭遇

覃恩

敕封孺人是歲外祖父又督學浙江十九年遷朝而府君以第一人入翰林歸第之日外祖父居主位一時盛事共以爲詞林佳話云明年外祖父以終養歸九月五妹生二十一年府君典試福建世父亦典試浙江順道乞假歸省吾母歎曰兄弟同歸稱慶洵天倫樂事我違色養已十二年病骨支離未知何時得還故土每一念及不禁淚潄潄下也二十二年府君晉右春坊右中允十一月六妹生吾母以積勞氣血耗損產後又血暈久之時不孝已八歲不忍令離左右數朝後又冒風致疾

府君驚惶錢太師母及仲舅母蔣恭人皆來視疾疾少  
間始去雖兩夫人待吾母之厚亦吾母積誠有以致之  
也二十三年府君晉侍講學士卽奉

恩命提督福建學政吾母始欣然曰吾還家有日矣然  
數載冰銜衣飾典盡寢室戶後質票幾滿不孝雖幼穉  
迄今思之猶在目前自支領養廉路費外皆出假貸時  
伯舅爲山左縣令於途次出迎亦從商貸始克抵家吾  
母嘗訓不孝曰人知汝父之好賓客樂施與不知汝父  
之廉介絕俗也方爲學使時債負累累道出維揚饒院  
運使致賕餼而運使與汝父交素厚似無不可受者汝

父託他辭却之實不欲以過客擾鹽政也我雖未同往學使署而精白一心以報

知遇卽此可推不幸僅止於此豈非命耶爲子孫者不可不知也旣抵家登堂見大父母大父已就衰步履不能如平時府君暨吾母喜懼交集府君旣奉

命不敢久淹遂就道留吾母侍奉大父母吾母亦赴吳中歸寧外祖父母外祖母患瘍已半載吾母率外孫男女於臥榻間起居亦懼之念多喜之念少時外曾祖母周太夫人尙康強吾母留侍未及一月卽歸至七月間外祖母病日加卽馳赴而勢已危急遂剪臂肉和藥以

進卒不效終天之恨創鉅痛深及十一月大父患下利  
症至明年二月轉劇四月後病日甚吾母每夜半焚香  
叩禱乞以身代及遭大故大母高年傷慟而府君暨世  
父母皆不在鄴下惟吾母及兩從兄同奉含斂府君在  
聞聞訃哀毀迫切奔喪抵建安之石脾疾作蓋蒞任凡  
十有四月每按試生童卷或取或去或前或後必親詳  
閱遇佳卷必加細評置下等必反覆再四惟恐屈抑而  
精力耗憊心血已竭至是以過毀感疾遂一發而不可  
救抵家日形神幾離扶昇至喪次悲號聲不能相續舉  
家驚惶翼日遂棄不孝等而逝嗚呼痛哉吾母疊遭大

變痛不欲生上念祖母在堂當代子職下視一男四女  
繞膝啼號忍痛主持喪事憶吾母率兩姊及不孝朝夕  
上食兩妹尚幼纍纍隨行屈指五十三年不知若何艱  
苦以至今日也嗚呼痛哉未虞祭卽爲不孝輩製黑布  
衣曰汝等每日定省祖母不可不從權也吾母自戊寅  
至丙申侍奉大母晨餐夕膳必親自檢點旨甘柔滑惟  
恐稍有不至戚黨往來肴饌必腆惟恐高年之意稍或  
有違十九年如一日及大母棄養吾母年五十有五矣  
哀毀如喪大父時甲辰歲外祖父壽終里第吾母自成  
服至送葬哀慟如禮吾母爲女爲婦送往大事無不躬

親而一身所集悲苦慘瘁之況淚眼幾枯矣四十二年  
不孝迷祖舉於鄉四十五年成進士歸班銓選自念先  
人兩世揚歷清華而不肖甘爲人下歸見吾母狀有愧  
色吾母慰之曰汝何不知足耶汝十歲而孤又幼失學  
吾何嘗過望汝能成立耶京朝官況味吾已備嘗他日  
苟得祿養亦可慰吾暮景但患汝不勝其任耳不孝受  
命不敢忘五十五年迷祖選甘肅崇信縣以親老告近  
改選山東昌樂縣五十六年乞假迎吾母赴任昌樂爲  
青郡積疲之缺歷任安陋就簡公堂以後草屋數間上  
漏下濕不孝一見愕然吾母進署周視屋宇笑曰寒素



人家得此亦不惡矣我初至京師時數載之間屢次遷徙或至局處一廂屋中夜鋪畫卷亦未嘗在意吾僅汝一子卽往甘肅吾亦同行汝但能安心供職不負此一縣人我固無往而不安也不孝謹受命是冬署益都縣兩月回任明年奏調濰縣其冬迎吾母至署私心稍覺目安益都濰縣去昌樂皆不過數十里不孝於謝赴任詞中有云去歲委署益都今茲奏調濰邑地皆鄰近俗較殷繁移家無跋涉之勞就養有旨甘之奉皆由中之言也五十九年大計迷祖以卓異送部引

見越三載吾母年近八旬長子天歿遂請於大府願乞

終養奉母回籍且請先行離任俟後任清查經手倉庫  
具結後然後通詳檄署曹州府同知不孝卽於同知任  
內詳請終養時嘉慶二年七月十五日也九月不孝奉  
吾母南歸十月抵家其明年元旦一至家祠書室落成  
亦一至自茲以後杖履不踰寢室矣不孝姊妹四人次  
姊早夭長姊歸錢氏姊壻歿長姊與吾母相依天性至  
孝不數年又歿一子一女女爲不孝長子廉甲婦子瀛  
斯庚申科副榜辛酉歲歿於京師吾母聞信欲哭不能  
出聲吞悲掩淚而已遂感疾乍寒乍熱醫家以瘧治之  
漸次就痊是時吾母年已八旬而耳聰目明思慮周到

不異六七十時終日端坐無倦色固不孝等所恃以無  
恐者嗣後歸朱氏妹及歸計氏妹相繼凋謝傷心摧悴  
兩目久不能視人近年來雖神明動定不異平日稍覺  
安寢之時多於往年或俟覺後從容進問安否輒曰吾  
未嘗睡也孰意遂爲衰象之見端耶恨不能防患未形  
以致不救不孝之罪萬死莫贖嗚呼痛哉今歲十月中  
旬吾母偶患欬嗽忽值驟寒痰勢日盛時或微寒微熱  
十六日忽覺暈眩醫家用溫中理痰之劑初投亦小效  
再服又患內熱徹夜不眠服養陰之劑吐痰無筭冀幸  
小愈再服又不效三十日痰聲不止氣息漸微是夜歸

無錫華氏長女遣人來問視不孝稟聞吾母猶頷之意  
望其歸十一月初二日夜長女至於臥側問安猶微聲  
答之頃之進湯飲僅受一匙再進不受遂棄不孝等而  
長逝矣呼天搶地無路可追悠悠蒼天曷其有極嗚呼  
痛哉嗚呼痛哉吾母在室時五六歲卽從外曾祖母周  
太夫人學紡績後隨外祖母至京婉婉聽從外祖父入  
朝吾母四鼓起衣裘所宜飲食寒煖無不纖悉周備不  
以煩外祖母外祖母亦倚吾母能得外祖父意也伯舅  
曹州公嘗舉以教諸女曰能如汝姑母盡孝道自宜爲  
狀元夫人矣及府君居官時外祖父同寓朝夕膳羞必

精必潔不同寓每日必遣人饋肴饌此吾母事親之節也府君廉介自守家無長物喜賓客性不飲酒而必使人盡歡一日方具食坐客已滿伯舅仲舅亦在坐趨內寢從吾母食見案頭惟鹽菜一盤而已乃顰顙而出吾母處之澹然及晚年每日誦佛號心經準提咒金剛咒以千百計亦茹素之日居多然未嘗一至僧寺尼菴也吾母治家不厭繁瑣織紉組紃綴裁度之事自少至老未嘗一日或輟也酒脯醢醬桃諸梅諸薑桂之屬造之有時儲之有素未嘗沽市以給也主婦早喪年屆八旬始以家事傳長孫婦然猶稟命而後行祭祀必誠必

潔四時之食未薦新不御此吾母躬行勤儉以循法度也府君急人之急不啻在已有舊戚年已就衰需次得叅軍不能赴任仰屋愁歎府君曰若憑限滿官失則身殉矣乃與吾母謀資助其行傾囊倒篋無所有爲假貸以給之俾得就道後卒於楚中僅有一寡媳及府君捐館後吾母熒熒撫遺孤或來告曰某將鬻屋何不及此時向索逋彼尚可償也吾母悄然曰我尚有一子彼無依無倚何忍奪其養命之源耶此吾母成府君之美始終如一者也不孝質鈍劣幼不知向學南歸時已九歲府君寄吾母書云四兒肯勤讀否我在此辦理考試無

不盡心場規雖嚴從未輕呵叱一士子和平樂易勸勉  
諄諄似他日我子縱不能讀書波不至十分下流此可  
以天理信之者也迄今展讀涕泗交頤是年五月吾母  
返自吳中卽命不孝受業於從父伯兄玉泉先生年十  
四未通文義吾母又命從伯兄習舉業伯兄口講指授  
如哺病兒兩載似稍知步趨矣自不孝在家塾課讀吾  
母爲不至吳中者五六年惟恐一日荒廢及戊子歲將  
赴京兆試吾母始攜不孝及兩妹歸寧且屬不孝於舅  
氏二林先生外家自長寧公倡明正學父子祖孫相授  
受舅氏於途次爲不孝指示大略證求真實絕去異同

門戶之見不孝從此稍知向學不至入於下流皆吾祖  
吾父之餘澤而無一非吾母義方之教也不孝之初至  
昌樂也遇有質訟者反覆開導不敢輕用刑吾母甚爲  
色喜及至雖邑禮讓成俗儒雅彬彬然地廣人衆訟師  
地棍芽蘖其間互相吞噬縣令初至設法巧試一有疎  
忽乘勢鴟張不得已先之以猛吾母戒不孝曰我一聞  
敲扑聲心輒怦怦且聞汝盛氣大呼聲徹寢內又慮傷  
汝身也當以和平之福養之母躁不孝謹受命不孝之  
將告養也除夕拜影堂忽心動椒盤圍坐從容稟曰兒  
進省欲陳情送母歸鄉里吾母曰我婦人不知閭外事



去就汝自淺之但汝素性率直愼無以此得罪於上官也此吾母教不孝服官之道也又讀所藏大父寄府君手札有二媳云今歲所領養廉且儘欠項償完之語府君寄吾母書亦言急項已償如釋重負遭家不造葬事甫畢吾母卽摒擋及一切衣服器玩盡以償逋收回借券不孝成人後無有以宿逋追呼者此吾母之不肯以孤寡累人而亦不以累遺後人也亡妻倪爲外舅太常公外姑章夫人所鍾愛及來歸吾母視之如女而加體恤焉憐其體弱不令理家事疾則親至其室慰藉之生一子一女自襁褓以至能行無一不勞吾母之心也長

子甫離乳哺卽令隨寢處長女亦如之亡妻之逝迄今  
二十四年吾母每念及不怡者久之爲姑之慈又如此  
大母疾革時命伯兄及不孝曰方伯公宗祠汝祖父所  
立爲我子孫者宜盡心敬奉妥侑先靈慎勿委之他人  
以我兩老人爲口實不孝等泣受命而先大父遺產屢  
經分撥祭田歲入不敷所出不孝自山左歸吾母命不  
孝以白金六百交吾珍姪生母顧太孺人經理生息俟  
稍有贏餘以佐先大父觀察公祠修理祭祀之用五世  
祖方伯公宗祠時祭歲修仍在觀察公祠支費永遠勿  
替方伯公長房茂實公後正初兄貧無所依先大父母

收養之終身不孝少時同家千從兄展祭祖塋傷茂實  
公之無後也從兄慨然曰我與弟有三子當爲茂實公  
立後不孝聽其言歸以告吾母亡妻在側曰此非應繼  
我子不能與爲人後君妾有子任爲立嗣可也方欲與  
辨吾母笑止之及次子又朔生吾母謂不孝曰汝妾有  
子矣鬼神不可爽信也不孝受命卽於署中爲正初兄  
以上三代位告以又朔爲之後及歸適修族譜卽告之  
族長志遠二叔父立議焉正初兄歿後已三十年長房  
二房兩分荒塚頽垣慘人心目乃爲修塚立碑歲時祭  
掃卽令又朔主之此吾母之敬宗繼絕善承先志者也

吾母謂不孝曰自吾爲汝家婦逮事舅姑事事必以濟人利物爲心汝父成就人材汲汲惟恐不及今我早寡汝位又卑爲目亦淺其無力及物亦何待言然一絲一粟苟可以有益於人者勿以善小而不爲也故吾母過力有不足者酌量扶助之性所樂爲無有勉強凡居心行事無一不可質之神明永享福佑有子不令遽速殃禍卑位不足以邀錫命薄德不足以遂顯揚而頑然之質又不得卽死尙可以爲人尙可以爲子耶吾母有弟六人妹二人伯舅曹州公仲舅學士公叔舅朝議公進士公卽二林先生季舅黃梅公今惟季舅一人而已仲

舅與府君以學問相切磋誼尤篤摯不孝需次依於舅氏出入三載及不孝到山左而仲舅已捐館矣哀哉吾母待人以誠親情彌篤其相處最久者蔣氏姑母劉氏從姊也而諸從姊亦皆於吾母爲親厚焉初一日陸氏從姊來視疾吾母氣息甚微猶執手意惓惓及從姊婦又問不孝言姊侯母壽辰當再來吾母曰尙能符耶孰意甫隔一日遂相嚮哭於寢室也痛哉不孝之生也吾母自乳至五六歲猶未免於懷褻間卽稍長非赴試赴銓固未嘗一日離鄰下也母子天性更相爲命吾母常謂不孝曰我男女五人目前惟汝一人我日夜禱告神

明幸留汝送我老人無他奢願也每一飯必問曰吾兒飯未每一嚮必問曰吾兒嚮未視六十餘垂白之子猶是孩提之在褓也今已矣叫號無聞不可追矣終天之痛無窮極矣死而有知從吾親庶有期矣和淚濡血無以敘其哀矣天乎天乎尙何言哉尙何言哉吾母生於康熙六十一年十一月三十日亥時卒於嘉慶十七年十一月初三日子時享年九十有一

敕封孺人例封恭人子一人述祖進士山東濰縣知縣署曹州府同知娶倪氏前卒女四人長適錢中銑舉人內閣中書次字劉敏學次適朱簡進士貴州玉屏縣知

縣署平遠州知州次適計綬太學生女皆前卒孫男七  
人廉甲前卒娶錢氏又朔爲族兄兆馨後娶倪氏震甲  
文灝聘楊氏循博聘畢氏成久曾佑孫女四人長適華  
瑞熊餘俱幼今謹卜十二月二十六日安祔於德澤鄉  
青山莊先考侍講學士府君之墓不孝述祖苦由餘生  
言不能文事不能悉惟當代大人先生俯鑒哀忱錫之  
銘誌以光泉壤感且不朽

亡姊錢氏孺人事略

孺人莊氏先翰林侍講學士府君之長女故中書舍人錢君諱中銑之妻也舍人爲故尚書文敏公冢子府君與尚書中表從兄弟交最善故申以婚姻焉孺人性慧幼讀孝經小學之書能舉其大義府君棄諸孤孺人猶在室與仲姊侍母日夕解尉撫視弟妹憂瘁交至年十九歸於錢氏事舅尚書公姑金夫人於京邸克盡婦禮舍人倜儻不羈方尚書公貴盛時謂功名可指取有不肯屑屑事章句孺人約與學櫛洗上堂退而舉按隨時有以砥礪之文敏公卽世備節終之典舍人旣釋服詣



謝

恩

特旨授爲內閣中書家問至戚黨相賀孺人愴然曰先  
尚書盡瘁所職故遂異數恩正恐報稱良難耳其明年  
舍人乞假歸時舍人大母吳太夫人在堂金夫人方侍  
養乃命孺人偕舍人北上所以儆戒相成者愈至而舍  
人亦日益謹飭襁被入直暇卽學書討論掌故孺人黽  
勉有無未嘗以分其意也甫數月而吳太夫人訃至舍  
人以承重奔喪時孺人瘍發齒齟勢甚危不飲食者十  
餘日稍聞趣舍人曰亟歸營喪葬尉母心無以我爲慮

也乃留孺人在京師獨力庀家事更益勞瘁創久不合  
時出盤血嗚呼孰謂膏肓之疾已中於此耶尚書公故  
清宦家無囊橐舍人亦頗澹於仕進歸久之念孺人勞  
瘁遠居欲至京師相攜歸久爲養母計金夫人領之時  
已患消疾諱不言倉遽就道卒於瓜洲舟次孺人在數  
千里外攜孤兒遠失所天以問至一慟幾絕艱難百罹  
得返子舍金夫人泣謂之曰吾昔以汝爲婦今以汝爲  
子吾與汝性命更相依慎毋自輕孺人痛哭受命未幾  
金夫人復遘疾竟不起孺人隻身楮持哀禮兼盡蓋此  
三四年中無一非憂患之日也尚書公既兩世殂謝叔

舅二人又宦游閩越間家無彊近親乃依於母氏延師  
課子曰望成立然春秋伏臘未嘗不親薦奠也

賜塋丙舍未嘗不躬祭埽也尙書公直

內廷久前後被賜

天章

宸翰祕府圖書及生平手澤所存詩文書畫以至片簡  
零編皆緘牋慎固閱時必歸展視無有遺者此又舊家  
子弟所忽而孺人能以一女子任之可爲難已甲辰冬  
以埽墓值暴風雨遂感寒浸患嗽孺人素不喜服藥涉  
夏復有腹疾雖精神如常而日漸羸瘠其弟述祖屢勸

醫療孺人曰弟謂草根木皮能益人年壽耶惟不昧其  
本性爲不死耳又言吾夢中不異醒時此可自驗之一  
端也死生之說吾知之矣矢堅屏藥物及疾革家人謀醫  
禱已無及矣傷哉孺人以乾隆五十年正月八日卒於  
母家距生於乾隆八年七月三十日年僅四十有三尙  
書公退朝嘗篝燈集子婦說古今事使各言所見爲之  
斷其是否孺人每引大體從容言之尙書公爲改容在  
浙江學使者署偶內集賦詩孺人得五律其領聯云浮  
雲歸海盡遠樹及山平尙書公大歎賞以爲得三唐句  
法餘人閣筆然孺人不欲以吟詠見自爲未亡人益束

書表不觀惟勤勤於家政而已同里有故家女假巫術  
往來士大夫家一日言舍人降其室求生時衣履或以  
告孺人孺人叱之曰是言何至於我耶我雖不知鬼神  
之事以理斷之知其誣也夫鬼各有歸神棲於主吾知  
奉祭祀教養遺孤使繼夫子志期地下相見不愧耳巫  
言何足嘗我其明達如此孺人事母孝先意承志以府  
君早見背所以望其弟者甚篤嘗病弟不能自奮發取  
當世榮名以克其家顧齟齬守下士節以是相譏切至  
今日而始思其言之痛也孺人子男一瀛斯女一字述  
祖子其世系詳兩家世譜故不載

亡妻倪孺人家傳

亡妻倪孺人諱蘭芬錢唐人祖諱國璉吏科給事中考諱承寬禮部侍郎總督倉場戶部侍郎終太常卿妣章夫人太常公有五女元配項夫人出者二繼室章夫人生孺人章夫人慈五女若一而太常公尤鍾愛孺人孺人幼疆記嘗車中見題壁詩爲太常公誦之令默寫不錯一字年十七歸於余事姑如母吾母撫教之如女與女公女妹相友愛如兄弟家庭之間怡怡如也先大母錢太夫人治家以禮法長幼肅然孺人每定省必侍語移時先大母棄養追述遺訓未嘗不流涕太常公官京

師孺人偕余南歸去父母家日遠思慕成疾藥裏方書  
與箴表常相錯也其後章夫人省墓錢唐歸寧於里第  
而太常亦曾以扈

蹕至江南得親拜其父母者惟此爾孺人自言生平所  
最難忘者歲時伏臘望衡對宇饋問往來在戚鄰嫺嫺  
皆然獨思一見父母而不可得卽幸一見又若有數焉  
限之遂爲畢生不再得之事此其情誠可悲也大常公  
章夫人之喪過常州哀慟幾絕訖送葬歸皇皇如有所  
失其天性固然矣往歲孕而病瘥瀕危僅乃獲安及余  
隨部檄來京師求祿養猶屢趨余行將行謂余數千里

遠遊念老母弱子其何能一刻安雖然幸自愛但以我  
爲兄弟可也子職我當任之其意欲以堅余四方之志  
而自忘其病已深也悲夫始病暑時下利至秋轉劇氣  
悟毆吐不能進飲食遂至不起蓋余至京師踰五月而  
孺人病且歿去孺人之歿四十三日而余始知之烏呼  
可悲也已孺人之弟時慶權丹陽令自病及卒得親視  
焉孺人生於乾隆十七年四月十七日申時卒於五十  
四年八月二十日辰時年三十有八男一人廉甲聘錢  
氏故中書舍人中銑女余伯姊出也女一人含章甫周  
歲孺人體素羸恆自憂命之不長然志甚銳汲汲焉時



進余所不及以爲名位事業皆有可自致何乃屑屑作  
章句儒長願顯爲後世誰相知余屢見黜於有司及成  
進士又退歸輒爲之氣沮烏呼榮悴遇也脩短寄也彼  
慮常餘於事故終身憂患之中以累其天年而中道夭  
於今已矣凡所冀望而不可得者今乃大覺矣無復爲  
我戚戚矣是安知不悔夫鄉之所憂也邪顧不自量者  
猶役役而未知所止也又安知不遺彼大覺者以大戚  
也邪而我誠何以爲情也於孺人之生旣無以榮之其  
死也又豈有以傳之獨俯仰身世無窮之感時時往復  
於胸中卽余之不能自己於斯者夫亦可以知其人也

日月有時略次梗概授兒子記之以傳於家傳

亾妻倪孺人墳志

嘉慶五年改葬城  
北德澤鄉之芮村

莊迷祖之妻倪孺人諱某錢唐人故禮部侍郎太常卿  
某之季女太常之繼室章夫人循法度而均一劬其躬  
以佐太常以燾其後嗣是生孺人孺人自幼及笄能得  
父母歡既嫁爲姑所憐愛相其夫不苟於隨切切若誨  
友比其終也一言一行令人有無窮之恩乾隆五十四  
年八月癸酉以疾卒年僅三十有八子男曰廉甲女曰  
含章余求祿養待選於吏部不得歸其明年廉甲卜兆  
於定安鄉之邊將以某月某日葬地不及畝廣其坎深  
足以容槨封而不樹庶後之人易守焉遂志之俾內諸

壙詞曰

既辟合矣害又析之終同歸於其居其爲悲也復幾時  
烏呼噫嘻